

史料旬刊

第二十六期

# 故宮博物院文獻館出版物廣告

文獻叢編

本館前刊掌故叢編出至第十冊現自第十一冊起更名文獻叢編體例改善材料加多書價照舊(每冊五角)第七輯業已出版

讀書堂西征隨筆

(清汪景祺著)

定價

粉紙每冊六角  
毛邊紙每冊五角

影印交泰殿寶譜

每冊一元

鈐拓故宮寶譜

每冊三元

影印籌辦夷務始末

本院影印道咸同三朝夷務始末現道咸兩朝均已完全出版同治朝已在印刷中道光朝全書四十冊售價二十四元咸豐朝全書四十冊售價

二十四元同治朝全書五十冊售價三十元三朝全書售價共七十八元道咸兩朝存書無多購請從速

史料旬刊第二十六期目錄

陝西扶風縣罷考案 原件藏三所

(一) 永鐘 常摺

(二) 永鐘 常摺二

修建寧壽宮工程案 原件藏三所

(一) 金英劉 輝廉浩 摺三

(二) 金英劉 輝廉浩 摺四

(三) 福隆安等摺

直隸總督方觀承奏據饒陽縣稟有劉四冒稱正紅旗宗室景壽家人招搖撞

騙情事請勅宗人府會部提審摺 原件藏三所

準噶爾夷人貿易案 原件藏三所

(一) 李繩武摺三

(二) 黃廷桂摺二

(三) 黃廷桂摺三

(四) 李繩武摺四

直隸總督方觀承奏明正定城南滹沱河壩工停辦歲修摺 原件藏三所

高樸私鑿玉石案 原件藏三所

(一) 高 晉摺三

(二) 楊 魁摺十

(三) 勒爾謹摺十

(四) 勒爾謹摺十一

(五) 勒爾謹摺十二

(六) 楊 魁摺十一

(七) 舒 文摺六

(八) 閔鶚元摺

(九) 薩 載摺五

(十) 畢 沅摺九

(十一) 畢 沅摺十


彙核嘉慶十七年各直省錢糧出入清單 原件藏三所 (四續)

地丁項下

(一) 廣東省

(二) 廣西省

(三) 雲南省



陝西扶風縣罷考案

永常  
鐘音摺

陝甘總督臣永常謹奏爲審明定擬具奏事竊照扶風縣生員屈炳等阻衆罷  
陝西巡撫臣鐘音  
考一案先經臣等於聞報之日立即遣員馳往彈壓查拿並令將案內有名  
犯全獲解省訊供究擬當將查詢此案起釁大略及辦理緣由會摺具奏恭奉  
硃批覽奏俱悉欽此欽遵查案內首從附和各犯節據委員暨該管府縣訪拿  
陸續報解到省臣等飭發司道公同研訊去後茲據西安布政使唐綏祖按察  
使武忱等將案內文武生員例應褫革者俱詳請褫革審明定擬招解前來臣  
等親提各犯逐加嚴鞫緣屈炳之弟屈耀充當斗行乾隆十七年扶風令張于  
畊奉文收買商販囤麥即在屈耀行內減價平糶共賣錢三百六十餘千十八  
年三月內屈耀將錢交縣內盤缺串底錢一千五百餘文該縣於六月間票差  
皂役吳起前往催補卽與屈耀爭鬧屈炳庇護其弟因與吳起互毆彼此受傷  
經街民勸散時有吳起之子吳永年向充馬夫因事在彼見父被毆曾向吵鬧  
屈炳欲毆旋卽走避屈炳赴縣具呈伊子生員屈謙益同屈耀隨後赴縣不意

吳永年邀約同役梁萬奇並皂役李壽在縣等候冀圖復毆洩忿適遇屈謙益屈耀來至縣城吳永年即將屈謙益毆推到地令梁萬奇幫同按住扯破謙益中衣拔毛塞口復用污泥塗其身面而皂役李壽聽從吳永年指使亦將屈耀扭毆當經營兵馬恭勸解而散屈炳等控縣批審呈府批查嗣因該縣調取入闈繼因證佐不齊尙未審結乃屈炳以該縣不卽審究疑爲縱差辱士氣忿不平遂起意欲乘該縣考試之時糾衆罷考以洩私忿十一月初八日伊戚生員辛大烈適來探望屈炳備述受辱難甘商欲阻考倩其幫助辛大烈應允於是屈炳先後糾約生員劉濬安寧喬玉書浼其附和均各允從辛大烈亦約生員高法孔高悅而劉濬復邀文武生員段文玉史秉忠史卜魏應科王三畏李時花王名選谷大成並約令李果秀胡子義轉約張彩鳳張敬等訂期十一月二十三日俱赴樊家庄酒鋪會議惟李果秀胡子義始雖應允後即畏罪未往餘皆如期而集屈炳猶往他處糾人未及親至辛大烈即在酒鋪內對衆備述屈炳父子受辱之事商圖罷考在坐之高法孔則以犯法力阻張敬史秉忠史卜谷大成魏應科則俱答應再商李時花王名選王三畏高悅則緘口不言段文



玉則云就是犯法少不得審問根源張彩鳳則稱這樣凌辱斯文何必考試衆論不一未經議定而散迨試期將近辛大烈復逼誘伊甥童生張文烈臨時相助張文烈始初曾云這是犯法的事恐怕不好後經辛大烈云有我你放心去之語亦即被惑應允十一月二十七日屈炳遇見童生張元儒告以被辱難甘約衆阻考並欲使該縣聞知畏懼即可將吳起等究處洩恨隨即口念令張元儒書寫阻考傳單先欲借扶邑舉人馬登雲出名以冀聳聽張元儒甫寫馬登二字而屈炳忽憶馬登雲曾爲義學師長與該縣相好寫之無益遂令張元儒混續一馬字以成馬登馬之詭名復思生員程宏道平日端方生童心服遂亦借名寫入又將伊及伊子屈謙益名字俱寫入單內卽煩張元儒持赴縣城置於衆人屬目之地冀使張令聞知張元儒遂將傳單擲於縣旁馬號而去二十九日當衆童投卷之時屈炳隱匿不出劉濬悟恐受累不敢上縣安寧喬玉書雖經赴縣不敢出頭僅在寓所慫恿同寓童生不必赴考惟辛大烈在縣沿街罵阻投卷之人伊甥張大烈因被逼誘亦接口叫罵適有童生高省三年僅十六愚昧無知隨聲幫罵當經該縣差役將高省三查拿曉諭衆童陸續投卷十

二月初一日點名入場衆童尙懷惶惑應考邊巡點畢出題時已晌午內有恐難完卷之人紛紛議論維時張文烈亦入場預考復以差役毆辱斯文縱容不究等語對衆張揚當有在場童生楊大度亦喊稱文字旣做不完不如出去以致衆童俱不完卷一闕而出該縣差役惟將最後尾行之甯紹楊芳二人拿獲餘俱奔散比時該縣家人在於馬號內拾有傳單一紙隨據縣府先後稟報當經臣等會差驛道公泰參將高宗瑾馳往彈壓查拿各犯到省飭發在省司道訊悉前情復經臣等逐加親審據各犯供認不諱再三嚴詰除現獲各犯之外並無別有附和之人單內所開之馬登馬遍行確查實無其人程宏道與屈炳等素無往來屈謙益先期赴省具呈均無與謀罷考之事查學政條例內開如有豪橫之徒逞其私忿輒敢聚衆罷考挾制官長者不可不嚴行治罪懲一警百審實均照山陝題定光棍之例分別首從治罪其逼勒同行罷考之生員襍其衣頂童生記名檔案俱停考試又例載山陝兩省刁惡頑梗之輩假地方公事強行出頭逼勒平民約會聚衆抗官者爲首照光棍例擬斬立決爲從擬絞監候逼勒同行之人杖一百各等語除張元儒於未到案之先已經病故無庸

置議外屈炳挾嫌倡議約會阻考復令張元儒書寫傳單密投馬號供證確鑿毫無遁情雖諸童鬩散在於入場之後而搖惑士心覺由伊起應照光棍爲首例擬斬立決辛大烈聽從預謀代爲糾約並在街叫罵欲阻投卷之人應照光棍爲從例擬絞監候張文烈雖僅隨同辛大烈在街叫罵但至場內復提屈炳等受辱之事致惑衆心劉濬雖未赴縣阻考但聽從屈炳指使在鄉糾人會議安寧喬玉書雖未出街喊阻但既聽從赴縣又向同寓諸生勸阻考試均不便輕縱俱應照爲從擬絞例酌減一等各杖一百流三千里至配所折責四十板高省三於場前在街附和叫罵楊大度在場中聲喊出去李果秀胡子義雖畏罪中止並不赴縣阻考但聽從劉濬之言轉約張彩鳳等赴庄會議均屬不合俱應照逼勒同行例杖一百各折責四十板張彩鳳段文玉雖不上縣阻考但當會議之時言語不馴亦屬不合均應照不應重律杖八十發學戒飭其張敬史秉忠史卜谷大成魏應科李時花王名選王三畏高悅高法孔等雖皆赴樊家庄會議均未允從竊紹楊芳訊未在場叫罵均應免其置議劉敏程宏道審係無干先行摘釋屈謙益於會議罷考以及阻考之時雖已赴省但伊父起意

罷考知情不阻亦應照不應重律杖八十發學戒飭屈燿應補錢文遲久不繳縣役吳起奉差向屈燿催錢輒與屈炳等爭毆致起釁端均屬不合皆應照不應重律杖八十各折責三十板革役並革去斗行馬夫吳永年逞兇約夥毆辱屈謙益等以致釀成事端應杖一百加枷號兩個月滿日折責四十板馬夫梁萬奇助毆幫按與扭毆屈炳之皂役李壽俱應照不應重律杖八十各折責三十板均革役餘審無干概行省釋屈燿拖欠串底錢文仍應照數追繳再查屈炳糾衆罷考阻撓公事以洩私忿不法已極相應請旨俟奉到硃批之日卽行正法以警刁頑除全案情節另行繕疏具題並扶風縣教官一任生員罷考不能約束職名照例附疏參處外所有臣等審明定擬緣由理合繕摺具奏伏祈皇上睿鑒訓示施行謹奏乾隆十九年二月十二日硃批「覽奏俱悉」

永常  
摺一

陝甘總督臣永常謹奏爲奏明事竊查扶風罷考一案業經臣等審明定擬恭摺具奏並聲明全案情節另疏題報其不能約束之該管教官卽於疏內照例

附參外扶風縣令張于畊才識本屬平庸聽斷亦多葺闕此案事端實由該令於屈炳具控之始不能剖晰是非即爲審結輾轉稽延激釀而成本應一併糾參以肅官方但屈炳創意阻考原爲挾制該令今即參劾誠恐滋長刁風轉致效尤殊有未便是以臣等再四思維此時姑置該令於不問統俟此案辦理完結後再將該令察核題參庶刁風不致滋長而官方亦得整肅矣所有臣等愚昧之見謹附奏明伏乞聖鑒謹奏乾隆十九年二月十二日硃批知道了



# 修建寧壽宮工程案

劉浩  
金廉類

## 摺三

奴才英廉劉浩金輝謹奏爲奏銷工料銀兩銅斤事遵旨成造寧壽宮後所各殿宇院內安設燒古銅缸二十八件內口徑五尺銅缸八件口徑四尺銅缸二十件俱已造成其口徑四尺銅缸二十件業於本年九月內陸續安設其口徑五尺銅缸八件現存鑄爐處俟明春駕幸圓明園後奴才等再行運往敬謹安設今據鑄爐處官員等報銷成造燒古銅缸二十八件按例共用鑄鑿銼刮磨光出亮燒古等匠七萬五千一百十九工五分壯夫七千三百九十八名內按二成節省鑄鑿嵌補等匠九千五百九十八工按二成半節省銼刮磨匠六千三百四十二工五分共節省各項匠工一萬五千九百四十一工五分計銀二千四百五十四兩八錢三分七厘除節省外仍實用各項匠夫工價銀九千七百五兩四錢六厘買辦物料銀一千五十五兩九錢用過鑄爐處各處交來雜項廢銅十二萬六千八百二十四斤八兩呈報前來奴才等即派查核房員外郎連城委署主事福寧覆加丈量稱驗銅缸斤兩及所用工料銀兩數目均與先

造過銅缸之例相符謹將用過工料銀兩分晰細數敬繕清單一併恭呈御覽  
爲此謹奏乾隆三十八年十二月初四日交總管太監桂元等轉奏本日奉旨  
知道了欽此

成造銅缸二十八件內口徑四尺二十件口徑五尺八件共用黃銅十二萬六

千八百二十四斤八兩每銅重一百斤用鑄匠十三工三分計一萬一千八

百七工按例節省二成計節省工二千三百六十一工淨用鑄匠九千四百四十六工

鑿匠二十六工六分計二萬三千六百十四工五分按例節省二成計節省工四千

七百二十三工淨用鑿匠一萬八千八百九十一工五分 銼刮匠二十六工

六分計二萬三千六百十四工五分按例節省二成半計節省工五千九百三十三工五分

淨用銼刮匠一萬七千七百一十一工 化銅礮五個計四千四百三十八個

立黃土三筐計二千二百六十三筐 糞土一筐計八百八十七筐 土坯一

百六十三塊計十四萬四千七百塊 蔴蔴二斤七兩計二千一百六十三斤

秫稽六個計五千三百二十六個 鐵絲一斤三兩三錢計一千七十斤

黑炭三十七斤八兩計三萬三千二百九十斤 渣煤二百七十五斤計二十



四萬四千一百三十斤 每銅重十二斤用 壯夫一名計七千三百九十八  
名 共嵌補釘五萬二百七十五塊每四塊用嵌補匠一工計一萬二千五百  
六十八工五分按例節省二成計節省工二千五百十四工淨用嵌補匠一萬五十四  
工五分 磨光出亮共折見方尺一千七百五十七尺六寸每見方一尺用  
磨石二兩計二百十九斤十一兩 磨炭五錢計五十四斤十四兩 磨匠一  
工計一千七百五十七工五分按例節省二成半計節省工四百三十九工淨用磨匠  
一千三百十八工五分 燒古共折見方尺一千七百五十七尺六寸每見方  
一尺用 西礫一兩二錢計一百三十一斤十三兩 胆礬一兩二錢計一百  
三十一斤十三兩 礶砂一兩二錢計一百三十一斤十三兩 燒古匠一工  
計一千七百五十七工五分

買辦

化銅礮四千四百三十八個每個銀一錢計銀四百四十三兩八錢 立黃土  
二千二百六十三筐每筐銀一分計銀二十二兩六錢三分 糞土八百八十  
七筐每筐銀三分計銀二十六兩六錢一分 土坯十四萬四千七百塊每千

塊銀七錢計銀一百一兩二錢九分 蕨蔬二千一百六十三斤每斤銀二分  
二厘計銀四十七兩五錢八分六厘 秫稽五千三百二十六個每個銀三分  
計銀一百五十九兩七錢八分 磨石二百十九斤十一兩每斤銀六厘計銀  
一兩三錢一分八厘 磨炭五十四斤十四兩每斤銀五分計銀二兩七錢四  
分三厘 西碌一百三十一斤十三兩每斤銀五錢計銀六十五兩九錢六厘  
胆礬一百三十一斤十三兩每斤銀六錢計銀七十九兩八分七厘 礪砂  
四十三斤十三兩每斤銀二兩四錢計銀一百五兩一錢五分 共用買辦銀  
一千五十五兩九錢

外僱

揚銅匠一千三百八十一工 番砂做模匠六千九百七工 倒火匠九百二  
十一工 卸罩匠四百六十工 鑿粗匠五千九百八十六工 鑿細匠一萬  
一千九百七十工 銼粗匠五千五百二十六工 銼細匠一萬二千八百九  
十七工五分 嵌補匠一萬五十四工五分 磨石匠七百九十一工 磨炭  
匠三百九十五工 出亮匠一百三十二工五分 燒古匠一千七百五十七

工五分 共用外僱匠五萬九千一百七十九工每工銀一錢五分四厘 計工銀九千一

百十三兩五錢六分六厘共節省工一萬五千九百四十一工五分計節省工銀

二千四百五十四兩八錢三分七厘 外僱壯夫七千三百九十八名每名銀八分

計銀五百九十一兩八錢四分

以上除節省外實用買辦物料工價銀一萬七百六十一兩三錢六厘

行取

營造司 鐵絲一千七十斤 黑炭三萬三千二百九十斤 渣煤二十四萬

四千一百三十斤

鑄爐處 毀銅十二萬六千八百二十四斤八兩

劉浩  
英廉  
金輝 摺四

奴才英廉劉浩金輝謹奏爲約估銅斤工料銀兩事遵旨寧壽宮皇極殿前添  
安燒古銅缸二件欽此欽遵隨交鑄爐處官員等按前造過銅缸節省之例一  
體詳加估計成造口徑五尺銅缸二件共約用黃銅一萬七百十四斤買辦物

料及匠夫工價銀兩共估用銀八百五十八兩九錢七分八厘所需銅斤即在鑄鑪處杵頭銅內動用工料銀兩請向廣儲司銀庫領用至煤炭鐵絲等項俱由各該處行取應用統俟工竣之日奴才等另行派員詳細核銷謹將約用工料銀兩細數另繕清單一併恭呈御覽爲此謹奏乾隆四十年二月二十八日具奏奉旨知道了欽此

成造口徑五尺銅缸二件共約用銅一萬七百十四斤按例每銅重一百斤用

鑄匠十三工三分計九百九十七工五分按例節省二成計節省工一百九十九工五分

分淨用鑄匠七百九十八工鑿匠二十六工六分計一千九百九十五工按例節省

二計節省工三百九十九工淨用鑿匠一千五百九十六工銼刮匠二十六工按例節省

六分計一千九百九十五工按例節省二成半計節省工四百九十九工淨用銼刮匠

一千四百九十六工化銅礮五個計三百七十五個立黃土三筐計二百二十

五筐糞土一筐計七十五筐土坯一百六十三塊計一萬二千二百二十五塊

棘麻二斤七兩計一百八十二斤十三兩秫稻六個計四百五十個鐵絲一斤

三兩三錢計九十斤七兩黑炭三十七斤八兩計二千八百十二斤渣煤二百

七十五斤計二萬六百二十五斤每銅重十二斤用壯夫一名計六百二十五名共約計嵌補釘三千塊每四塊用嵌補匠一工計七百五十工

按例節省二成

計節

省工一百五十工淨用嵌補匠六百工磨光出亮共折見方尺一百三十尺每

尺用磨石二兩計十六斤四兩磨炭五錢計四斤一兩磨匠一工計一百三十

工

按例節省二成半

計節省工三十二工五分淨用磨匠九十七工五分燒古共折見

方尺一百三十尺每尺用西碌一兩二錢計九斤十二兩胆礬一兩二錢計九

斤十二兩礪砂一兩二錢計九斤十二兩約用買辦化銅礪三百七十五個每

個銀一錢計銀三十七兩五錢立黃土二百二十五筐每筐銀一分計銀二兩

二錢五分糞土七十五筐每筐銀三分計銀二兩二錢五分土坯一萬二千二

百二十五塊每千塊銀七錢計銀八兩五錢五分七厘蕪蕪一百八十二斤十

三兩每斤銀二分二厘計銀四兩二分一厘秫稽四百五十個每個銀三分計

銀十三兩五錢磨石十六斤四兩每斤銀六厘計銀九分七厘磨炭四斤一兩

每斤銀五分計銀二錢三厘西碌九斤十二兩每斤銀五錢計銀四兩八錢七

分五厘胆礬九斤十二兩每斤銀六錢計銀五兩八錢五分礪砂九斤十二兩

每斤銀二兩四錢計銀二十三兩四錢共用買辦銀一百二兩五錢三厘外僱揚銅匠一百十六工番砂做模匠五百七十三工倒火匠七十八工卸單匠三十九工鑿粗匠五百五工鑿細匠一千一十一工銼粗匠四百七十九工銼細匠一千八十九工嵌補匠六百工磨石匠五十八工磨炭匠二十九工上亮匠十一工五分共用外僱匠四千五百八十七工五分每工銀一錢五分四厘計工銀七百六兩四錢七分五厘共節省匠一千二百八十八工計節省工銀一百九十七兩一錢二分外僱壯夫六百二十五名每名銀八分計銀五十兩以上除節省工銀一百九十七兩一錢二分外共實約用買辦物料工價銀八百五十八兩九錢七分八厘行取營造司鐵絲九十斤七兩黑炭二千八百十二斤渣煤二萬六百二十五斤鑄爐處杵頭銅一萬七百十四斤

福隆安等摺

臣福隆安英廉劉浩四格謹奏爲奏聞續估錢糧數目事恭查修建寧壽宮工程先經臣等節次奏明後三路殿座原續估需工料銀七十六萬五千八百八

兩二錢三分四厘除取用官辦木植扣留銀九萬七千五百四十兩六錢二分七厘存庫不領外實需銀六十六萬八千二百六十七兩六錢七厘各等因在案今據該管工監督等呈報所有原續估外節次遵奉諭旨閱是樓後東山添蓋正房三間遊廊三間東抄手樓後簷改做點景樓一座四層殿東山接蓋庫房三間西山添蓋值房二間影壁一座景福宮東山添蓋值房三間佛日樓添蓋值房一間景祺閣前院改塼冰紋石地面樂壽堂西山外添做點景樓一座古華軒碧螺梅花亭內裏添安楠栢木天花符望閣南院內改塼冰紋石地面保泰蹈和門內影壁兩邊添砌院牆四道養性門前添做暗溝一道養性殿樂壽堂三友軒頤和軒景祺閣是樓符望閣延趣樓抑齋遂初堂東配殿添配硬木裝修等項除所需木植在於舊料內揀選抵用外淨需銀一萬四千十二兩七錢六分四厘再寧壽宮前路殿座估需工料銀五十三萬七千八百五十八兩一錢三分七厘內除取用官辦木植扣留銀四萬五百十三兩六錢一分八厘存庫不領外實需銀四十九萬二千三百四十四兩五錢一分九厘等因奏明亦在案今據該管工監督呈報查得原估外寧壽宮後簷並兩山添擊簷

廊後簷添做地溝並烟筒二座西面大牆外添蓋諸旗房六十一間改蓋諸旗房十二間皇極殿內裏陳設屏峯寶座一分寧壽宮並圍房東西六所各殿座內裏裝修原估內未經估計應一併補入又添辦旱白玉石燈座十二分粘修舊燈座十二分新添腰圓石座十二分並日晷月影各項石座四十六分粘修舊石座六分等項除所需本植在於舊料內揀選抵用外淨需銀二萬二千七百九十四兩三錢七分二厘再查本工所備磚塊內因奉旨建蓋閱武樓撥去新樣城磚三萬五千塊舊樣城磚十萬塊將寧壽宮一切傍座小房改用辦買磚塊等因在案查撥去磚塊共值銀三千七百二十五兩應請一併支領隨工辦買以濟工需以上前後路共續估銀四萬五百三十二兩一錢三分六厘請仍由廣儲司支領陸續應用謹將續估前後路工程逐款分晰銀兩細數另繕清單一併恭呈御覽爲此謹具奏聞乾隆四十年五月二十四日奉旨知道了欽此

寧壽宮後三路估外續添活計內 閱是樓東山添蓋正房三間遊廊三間頭停寗琉璃瓦蘇式彩畫估需工料銀九百十七兩六錢二分六厘 東抄手樓



後簷改做配景樓房五間安垂柱繼環沿邊石挂落花磚成造頭停甍琉璃瓦  
蘇式彩畫估需工料銀三百六十二兩六錢八分 隨四層殿東山添蓋庫房  
三間頭停甍琉璃瓦估需工料銀一千三十一兩六分四厘 四層殿西山添  
蓋值房二間影壁一座頭停甍琉璃瓦蘇式彩畫估需工料銀一百九十七兩  
二錢四厘 景福宮東山添蓋值房三間頭停甍琉璃瓦蘇式彩畫估需工料  
銀三百四十五兩三錢二分五厘 佛日樓西山添蓋值房一間頭停甍琉璃  
瓦蘇式彩畫估需工料銀一百五十四兩九錢六分二厘 景祺閣前院改墁  
水紋石地面並翠鬢山洞添安門口估需工料銀三百五十一兩五錢三分三  
厘 樂壽堂西山外添做點景樓房一座安垂柱繼環板沿邊石琉璃花挂落  
磚成造蘇式彩畫估需工料銀一百十九兩六錢六分一厘 古華軒內裏添  
安楠栢木天花估需工料銀一千二百九十兩七錢 碧螺梅花亭內裏添安  
栢木嵌紫檀木天花估需工料銀四百七十七兩一錢 符望閣南院內改墁  
冰紋石地面并轉角樓拆改裝修估需工料銀二百三十一兩六錢一分一厘  
保泰蹈和門影壁兩邊添砌院墻四道頭停甍琉璃瓦隨開門口估需工料

銀四百七十九兩三錢七分八厘 養性門前添做豆渣石暗溝一道估需工料銀一千三百二十二兩四錢二分 養性殿內裏裝修續添仙樓上下包鑲楠木柱子檻牆板紫檀木包鑲門口十八座窓桶十二座紫檀木供櫃一座欄杆二扇夾紗方窓一座楠木包鑲櫃格一座門桶門口十三座窓桶四座楠木欄杆二扇寶座後添安杉木壁子一槽地平煖床十張 樂壽堂續添包鑲楠木板牆二槽紫檀木鑲門桶一座鑲門口七座鑲方窓四座爐座四座香筒座二個楠木鑲門桶門口十一座鑲方窓四座書格一座貼落杉木窓桶一座壁子門三扇楠木包鑲煖床三張紫檀包鑲地平一座 三友軒續添楠木包鑲踏蹠一座書格下檻牆板一槽紫檀木鑲真假門口三座方窓口一座楠木鑲方窓桶一座配做楠木竹式床挂面一分 頤和軒續添楠木包鑲板牆一槽紫檀木鑲門口門桶七座鑲方窓二座楠木檻窓一槽鑲門桶門口四座鑲方窓一座供桌十五張 穿堂續添進深杉木板牆二槽紫檀木鑲門口二座景祺閣續添紫檀木配添萬字方窓二扇紫檀木鑲門口二座楠木鑲門桶三座楠木樓口飛罩二槽方窓一座隨戲臺曲尺壁子二槽楠木別檯四張香

几一張 閱是樓續添廊門桶二座花梨木包鑲床二張 閱是樓東山正房  
續添板牆三槽煖閣後門口一座飛罩一槽楠木方窗一槽紫檀木鑲門口一  
座楠木鑲門口三座楠木包鑲床三張 抄手樓二座續添板牆六槽楠木  
飛罩一槽方窗三座 東四所正殿四座配殿八座續添楠木鑲門桶門口十  
九座楠木方窗九座 景福宮續添紫檀木鑲門桶門口三座方窗口一座  
楠木包鑲床一張 梵華樓續添紫檀木鑲門桶一座推門一扇 佛日樓  
續添楠木貼落假柱子二根踏躑十一座紫檀木供桌一張花梨木供桌六張  
抑齋續添進深板牆一槽楠木落地罩床罩三槽 禊賞亭續添楠木條桌  
二張 遂初堂改添板牆四槽紫檀木鑲門口二座 遂初堂東配殿續添楠  
木落地罩二槽嵌扇一槽線法壁子五槽 萃賞樓續添板牆一槽楠木鑲  
真假門口九座紫檀木琴桌二張 轉角樓續添花梨木陰紋罩二座落地罩  
一槽 延趣樓續添楠木鑲門口三座後簷方窗二座 玉粹軒續添楠木佛  
座一道方窗一座 符望閣續添紫檀木鑲門口二十一座門頭花四塊券門  
楠木門頭花八塊花梨木櫃几一張 竹香館續添楠木板牆一槽門桶罩二

座門桶一座 倦勤齋續添楠木鑲門口十三座圓光窓一座栢木鑲門桶一座 景祺閣後值房二座內裏添板牆二槽落地罩床罩六槽嵌扇四槽煖床三十八張 東西廂房四座內裏添隔斷板四槽真假門口八座方窓四座煖床二十張等項並板牆油飾共估需工料銀六千七百三十一兩五錢共估需銀一萬四千十二兩七錢六分四厘

寧壽宮前路估外續添活計內 皇極殿內裏屏峯寶座楠木成做漆飾掃金地平欄杆杉木柱頭繚環板楠木硃紅漆飾估需工料銀二千五百十八兩九分五厘 寧壽宮後簷並兩山添安擎簷廊十七間安裝連籠擎簷枋繚環板雲龍雀替成造柱木硃紅油飾彩畫金琢墨估需工料銀四千六百三十四兩六錢三分五厘 寧壽宮後簷添做銅烟筒二座四面包砌細城磚上安銅頂二座頭停椽望瓦片廡座成造並地溝二道估需工料銀一千八百九十三兩四分五厘 西大牆外添蓋諸旗房六十一間改蓋諸旗房十二間共計七十間內隔火二十間安砌素白琉璃椽望頭停宸挂袖琉璃瓦估需工料銀三千九百三十三兩五錢五分三厘 寧壽宮內裏神亭一座神廚毘盧帽挂面

一槽琴腿炕沿七堂排插板一槽八方神柱一根東次間後簷仙樓一座樓下  
楠木落地明一槽檻窓一槽包鑲床十張樓上帶子板二槽毘盧帽挂面二分  
欄杆二堂東西圍房進深隔斷板三十槽松木床六十張東西六所前正殿內  
裏進深板墻六槽楠栢木嵌扇六槽落地罩六槽面闊落地罩床罩十二槽地  
平床四十八張後照房進深隔斷板十八槽松木床四十八張東西廂房進深  
隔斷板十二槽松木床十二張並神亭漆飾隔斷板油飾裱糊等項原估內未  
經估計今估需工料銀五千三百八十六兩五錢三分三厘 添安新旱白玉  
石燈座十二分粘修舊燈座十六分新添腰圓石座十二分並續安日晷月影  
各項石座四十六分粘修舊石座六分共計九十二分估需工料銀四千四百  
二十八兩五錢一分一厘共估需銀二萬二千七百九十四兩三錢七分二厘  
二共銀三萬六千八百七兩一錢三分六厘 補辦撥給閱武樓新樣城磚三  
萬五千個舊樣城磚十萬個計需磚塊銀三千七百二十五兩通共估需銀四  
萬五百三十二兩一錢三分六厘



直隸總督方觀承奏據饒陽縣稟有劉四冒稱正紅旗宗室景壽家人招搖撞騙情事請勅宗人府會部提審摺

直隸總督臣方觀承謹奏爲請旨事據饒陽縣知縣周天度稟稱本年十一月初七日有劉四口稱正紅旗宗室奉恩將軍景壽家人赴縣投書并遞呈詞一紙接閱呈札稱係伊主景壽借給王道行錢文未清道行被夥計劉廷修與田正宗局騙請拘劉廷修等究追還項呈札俱兼清字札內用有圖記行踪詭詐當將劉四并同行之劉肅拿獲等情將原札呈詞稟送到臣臣隨提閱原卷係武舉郭瑞控王道行即王澤普借欠錢文前縣范鎔斷令清還而王澤普以劉廷修欠項作抵經衆算明俟廷修還欠之日轉還郭瑞具詞懇息在案今劉四輒敢赴縣投遞書札懇將劉廷修拘拿究追顯係棍徒勾串挾制隨委易州理事通判雙鼎星往會同該縣嚴拿各犯到省傳同兩司逐一親訊據劉四即劉國廷供係宗室奉恩將軍景壽乳母之子住居涿州在景壽家往來甚熟遂冒稱家人在外招搖本年九月內有伊妻舅翟奇并劉肅劉成三勾引王澤普向該犯告知劉廷修欠錢未還一事囑令設法催追劉四即設計以王澤普借欠

宗室錢文被劉廷修局騙爲名冀圖追出分肥令劉肅捏寫借券呈稿伊妻父翟顯揚代爲謄寫又捏宗室景壽書札一封復於呈札之上兼寫清字據劉四供係進京懇求宗室景壽親筆并私刻木戳鈐用赴縣投遞致被拿獲又究出上年四月內蠡縣武生楊成烈爲旗人王秀借項涉訟有李月千等央該犯轉邀宗室景壽赴縣說情該縣未允而節次往返盤費楊成烈等花用銀二百兩景壽無奈遂令魏尙義代立欠約作爲借項又上年七月內固安縣賈八兄弟毆打滿成玉告縣劉四與滿成玉誼屬親戚邀景壽至縣投書說情該縣將原書擲還後滿成玉給景壽盤費銀五兩又本年三月內因涿州民王臣等控爭絕戶家產一案劉四同景壽義子黃禿子邀請景壽至州說情許銀百兩先給三十兩劉四分用二兩因係已結之事不能翻案餘銀未給等語并據繳出護身執照一張稱係乾隆十年宗室景壽所給臣隨將供出三案提取蠡縣固安涿州原卷查核并據蠡縣知縣杜曰惠覆稱楊成烈控告旗人王秀借銀三百兩未還一案係理事廳審斷行縣着追上年四月忽有管旗莊大人來見口稱奉恩將軍向與楊成烈合夥貿易被王秀借欠銀兩未還可將伊名下地畝開



給收租當以事係理事廳審斷又無部行牌文不便開給回覆其是否管理旗莊夫人未知真假等情據固安縣知縣張柏覆稱上年六月賈自隆等毆傷滿成玉一案訊係賈八行兇照例保釋醫治旋於七月赴鄉查捕忽有劉姓賫書一封口稱奉恩將軍景大人遣伊面呈拆閱來札係與滿姓說情欲將賈八兄弟三人全行責處當以鬪毆憑傷定斷將原書擲還一面傳集各犯驗明滿成玉傷已平復將賈八照律責處銷案宗室景壽並未親來即劉姓亦未令進見等情據署涿州知州程有成覆稱王臣等控告王國治等朋謀王重絕產一案前任參革知州李鍾俾任內屢斷均分具詳西路同知轉詳順天府尹批結在案茲面詢李參牧據稱本年三月內有宗室景壽口稱有公事來見面言王臣王煥係伊地戶事屬理直代白甚力意欲將絕產歸王臣等當以伊等甚屬無理已經斷明詳結回覆景壽亦即辭去不知是否宗室抑係頂冒等情各稟覆并送原卷到臣經臣逐一查閱與所稟無異查劉四即劉國廷以宗室景壽乳母之子遂冒稱家人在外遇事生風勾結伊妻舅翟奇生員劉肅等捏寫書狀文約私刻圖記招搖撞騙甚屬不法亟應按律嚴究至所供與宗室景壽通同

之處雖稱投饒陽縣書狀清文係景壽親筆赴蠡縣固安涿州說情皆景壽親到但係一面之詞而各州縣稟內如固安縣並未與景壽接見蠡縣涿州雖經接見素未認識是否實係宗室景壽抑劉四另有串結假冒之人自須將劉四等解京與景壽面同質對庶可定案除飭廳縣將劉四翟奇劉肅翟顯揚即翟居欽楊成烈魏尙義即魏老玉六犯即行解部並將原札呈詞執照咨送聽候質對未獲之李月千黃禿子等現在分飭嚴拿其餘牽連已未獲各犯另審按擬完結相應恭摺具奏并另具供單進呈伏乞皇上睿鑒勅交宗人府會部提審照例辦理再照蠡縣固安涿州三州縣雖查無聽情枉斷情事但平時失於查察當其投書說情之時又不詳報亦屬不合除涿州知州李鍾俔已經參革外所有蠡縣知縣杜日惠固安縣知縣張柏臣謹一併附參聽候審明分別議處謹奏乾隆十八年十二月十五日硃批已有旨了

準噶爾夷人貿易案

李繩武摺三

安西提督臣李繩武謹奏爲請旨事乾隆十三年四月十四日准駐防哈密鎮臣王能受駐劄哈密辦理夷情事務理藩院主事諾穆渾哈密貝子玉素富咨報乾隆十三年四月初十日據駐劄三堡遊擊董茂林稟據烏克爾防卡千總馬明稟稱初九日未時據後墩登高目兵馬漢得瞭見鹹泉子路上有騎馬二人直奔烏克爾卡倫千總即帶兵出柵查問係從準噶爾脫出夷人二名騎馬二匹背烏鎗一杆衝袋一副鉛子七出小刀二把火鏢二把理合稟報等情轉稟前來據此總兵隨差千總張玉奇帶領通丁前往查詢曾否遇彼處之人拿獲復逃有無追逐踪跡等事茲於十二日據該千總稟報千總至烏克爾卡倫查詢脫出夷人二名一叫阿濟把爾第一叫尼牙斯問據阿濟把爾第供稱我二十九歲了原是吐魯番纏頭在魯古慶住管我的頭目叫漫漢伯克我老子叫陌陌胡哩右眼裏有個蘿葡花我娘叫奴魯素我有兩個叔叔一叫都阿胡哩一叫跌裏麥兩個嬸娘名字我記不得了還有我哥哥叫嗎嗎木悶一個小

兄弟名字也忘記了我十三歲上冬同我哥哥拾柴被準噶爾家把我兄弟兩個搶去不知把我哥哥搶到那裏去了再沒有見面把我搶到博克達地方給達什加里爲奴管我們的宰桑叫通嗎木到第二年聽見人說我們吐魯番纏頭都搬到天朝來了我在裏頭給人家爲奴放牲口常被主兒打罵把我的門牙踢吊了兩個常常打的我一頭傷痕我時常想要逃走有這尼牙斯也是吐魯番纏頭上年被搶進去的同在博克達地方與人家爲奴受苦他主兒也打罵的狠常向我說要逃走我兩個約了日子我拐了個女人叫愛里吉這尼牙斯也拐了個女子叫巴達什都是纏頭骨頭與人家爲奴受苦素日合我們好情願跟我們一同逃走我們偷了四匹馬三月裏從博克達起身我記不得日子了因黑夜裏逃走忙中沒有帶上口糧在路上把一匹馬宰了做口糧吃剩下三匹馬我們四個人一日換著疊騎跟著往天朝做買賣來的人走過的踪往東走了八天到噶順地方遇見裏頭送了做買賣回去的人把我們拿住解到烏蘭烏素卡子上將兩個女人著纏頭帶往西南赴吐魯番的路上去了把我兩個著解往博克達交給我們的主兒去哩那坐卡子的是七個人內中派

了一個達子騎牽兩匹馬背了一杆鎗把我兩個的手向前綁了押著步行走了半天那押我們達子的馬把鞵斷了下來拴馬鞵這個空子裏我兩個就先裏走用牙將綁手的繩子咬開拾了幾塊石頭藏在路傍土圪塔背後等那個人過來我們拿石頭照他項上一石打下馬來就把他綁住騎了他的兩匹馬將他背的一杆鳥鎗一副衝袋一口袋炒麥子我們俱都拿上又逃走了七天纔瞭見這裏卡子被人來將我們就拿住等語又問據尼牙斯供稱我四十歲了常聽得人說我原是吐魯番纏頭五歲上被準噶爾家搶去的我家裏有無父母兄弟我都記不得了我在博克達地方給依替格里家爲奴受苦我主兒常打罵我把我右眼睛打壞了又拿刀子把我左耳輪割了一綑子我受磨不過時常想要逃走與這阿濟把爾第商量投奔天朝來了餘供與阿濟把爾第同千總等說如今澤旺多爾濟納木扎爾甚屬恭順時常打發人來在大皇帝上請安進貢他那裏逃來的人不便收留若將你們解送回去恐不能得生賞給你們口糧自己回去罷據該逃回等說我們原是吐魯番纏頭不願在準噶爾地方爲奴受罪況我阿濟把爾第父母叔叔兄弟都搬到天朝受大皇帝厚

恩所以我們商量逃來路上又被人拿住死裏投活又逃出來如今若不收留再無處求生與其回去死在準噶爾裏頭不如死在中國地方做鬼也到好處了我們萬萬不肯回去求施恩收留我們就得活命了等語理合具稟請示等情據此總兵等查此次逃來回子二名經差員查詢既稱逃至中途被拿復逃自未便收留但該逃回等苦求不回供係吐魯番纏頭上年被擄之時阿濟把爾第尙有父母叔叔兄弟尼牙斯當時年幼有無父母兄弟詢問俱皆不知是否實情除將該逃回等暫留卡倫看守外相應咨請飭查其應否收留之處伏候賜示辦理等情咨報到臣臣隨密行辦理瓜州回民事務理藩院員外郎伊達穆轉行扎薩公額敏和卓將逃回阿濟把爾第所供父母叔叔兄弟在伊部落下逐細確查果否俱有其人再尼牙斯雖被擄時年幼不能記憶父母兄弟該扎薩克公處原日有無稽考之處并令伊部落下有無識記之人一併確查具報去後旋據該部郎伊達穆呈據扎薩克公額敏和卓呈稱蒙此查據得頭堡正千戶胡達把爾第稟稱魯古慶所屬人內嗎嗎特胡哩兒子名叫阿濟把爾第先前在吐魯番魯古慶地方所住原先係漫漢伯克所管於雍正五年內

我額敏和卓伯克管轄雍正九年被準噶爾掠去是實今再查得阿濟把爾第他老子名叫嗎嗎特胡哩右眼內有蘿蔔花是實雍正十一年在塔爾納沁地方死了他娘名叫奴魯素十二年在瓜州地方死了他兩個叔叔一個叫拉麻胡哩一個叫達爾瓦胡哩連伊女人節年俱都死了阿濟把爾第二個哥哥叫嗎嗎特木悶同阿濟把爾第打柴也被準噶爾人掠去了今止有他大哥哥叫多羅特嗎嗎特一個兄弟叫額敏俱見在是實等情據此即傳喚多羅特嗎嗎特等前來查詢據伊等所供與正千戶胡達把爾第稟說無異我額敏和卓細想是實再尼牙斯據我部落下頭目等細加確查並無知曉他的父母兄弟親戚人等亦無檔案稽查又無識記尼牙斯之人不敢冒認等情轉呈到臣臣查鎮臣王能愛等前詢該逃回阿濟把爾第供稱伊父母叔叔哥哥之名字與辦理瓜州回民事務理藩院員外郎伊達穆查覆之名字字音之間多寡稍異且該逃回前供內並未說出伊大哥哥多羅特嗎嗎特名字臣復移查該鎮臣王能愛等覆咨內開照依所駁情節隨查據逃回阿濟把爾第供說我原是吐魯番纏頭名子實叫阿濟把爾第我從前被搶時纔十三歲到如今十幾年了

將我的父母叔叔兄弟名子都記不切實了該逃回隨放聲慟哭說如今提起我就都想起了我老子原叫嗎嗎特胡哩我娘叫奴魯素我兩個叔叔一個原叫拉麻胡哩一個原叫達爾瓦胡哩我二哥哥原叫嗎嗎特木悶同我被搶進去再沒見面一個小兄弟原叫額敏我原有個大哥叫多羅特嗎嗎特前日問我時節致一時沒有說出止說與我打柴同被擄去的二哥哥這都是實情竝不敢撒謊懇求將我收下與我父母叔叔兄弟團聚見得一面就霑恩了等情咨覆前來該臣看得此次脫出逃回阿濟把爾第尼牙斯人供係吐魯番回民昔年被擄羈阻賊巢與人爲奴遭主凌虐或踢落牙齒或打壞眼目刀割耳輪受苦不過因思伊類均沐皇恩搬移天朝故二人私相約會偷竊馬匹同與伊等私好之回婦結伴投來於中途被送貿易回巢之人拿獲已將回婦帶去而伊二人復又乘隙逃脫經我處拿獲曉以伊處台吉在大皇帝前甚屬恭順和好逃來之人不便收留隨給與口糧令其自行回巢乃該逃回等難受其苦楚折磨念切骨肉屢求斷不肯復回既准該鎮臣王能愛等咨報到臣臣查阿濟把爾第係瓜州扎薩克公額敏和卓部落之人見有伊之弟兄可認該逃回哀



求收留與伊骨肉團聚至尼牙斯不能記憶父母名子該扎薩克公雖無檔案可稽然亦係昔年被擄之人但該逃回等係逃走後被獲復逃之人逐之不去哀懇迫切情似堪憫經臣往復查明可否收留照例將阿濟把爾第轉交扎薩克公額敏和卓令其手足團聚尼牙斯解京安插之處臣未敢擅專除咨令鎮臣王能愛將該逃回等暫留卡汛聽候辦理外謹繕摺恭請皇上睿鑒訓示遵行爲此謹奏乾隆十三年五月初三日安西提督臣李繩武硃批軍機大臣等議奏

### 黃廷桂摺二

甘肅巡撫臣黃廷桂謹奏爲奏聞事竊臣據甘肅道鈕廷彩稟稱本年閏七月初六日據通事傳說有貿易夷目額連胡里求見廷彩因遠夷不便拒絕隨同部郎甘布筆帖式德祿順在於公所令其謁見該夷目取出夷字一紙緝緞一疋口稱係伊台吉帶送禮物廷彩隨以酒食慰勞款待而去其緝緞一疋已交官商張有瀾收訖俟夷目回巢之日從厚以物酬答所有原來夷字及譯出之

文相應呈送等情臣查閱譯出夷字係感戴聖恩在肅交易求地方大員照看之語但原來夷字是否與譯出之字相符臣未能識別相應將該道呈送夷字及譯出之字一並恭呈御覽伏祈皇上睿鑒謹奏乾隆十三年閏七月二十八日硃批覽

黃廷桂摺三

暫理陝甘二省事務甘肅巡撫臣黃廷桂謹奏爲請旨事竊臣於閏七月二十一日准提臣李繩武咨稱駐哈總兵官王能愛於乾隆十一年四月二十一日到哈扣至本年四月二十一日已滿二年派換之期因熬茶夷使本年尙未回巢且進貢以及貿易夷人接踵而至一切防範並夷情等事正資該鎮熟手料理是以未經咨請今熬茶夷人及進貢夷使已經回巢貿易夷人起程赴肅約於九月間即可事竣所有總鎮王能愛相應咨請派換等因到臣臣卷查善後案內駐防哈密統兵官原議派副將一員於安西及甘涼肅各標內揀選二年一換遵照在案嗣於乾隆十一年正月初十日因總統哈密防兵加總兵銜副

將瑚寶丁憂經前督臣慶復奏請恭奉上諭總統哈密駐防官兵著大同鎮總兵王能愛去欽此查鎮臣王能愛駐哈以來迄今已滿二年例應更換應否照依原議於安西及甘涼肅各標內揀派熟諳邊情副將一員俟貿易夷人事竣回巢之後前往更換抑或仍派總兵官恭候欽點赴哈更換駐防之處臣未敢擅便相應繕摺恭奏伏祈皇上聖訓遵行謹奏乾隆十三年閏七月二十八日硃批軍機大臣等議奏

#### 李繩武摺四

安西提督臣李繩武謹奏爲奏聞事乾隆十三年閏七月初七日准駐防哈密鎮臣王能愛駐劄哈密辦理夷情事務理藩院主事諾穆渾哈密貝子玉素富咨報據駐劄三堡遊擊董茂林稟稱遊擊巡查卡倫至沙棗泉據瞭墩卡兵沈則明稟報初二日申時在瞭墩西四十里泉子上拿獲步行逃夷一名手拿馬鞭子一把轡頭一把皮葫蘆一個小刀一把木盃一個並無馬匹器械隨領至瞭墩卡倫理合報明等情遊擊卽赴瞭墩查詢外合先稟明等情據此總兵查

前項逃夷或係準噶爾投誠之人或係昔年被擄我內地之人有無被獲後復逃情事自應查詢明確不得概行收留隨差弁帶領通丁前往瞭墩同遊擊董茂林查詢明確如有前項情事即令逐回去後於初五日據遊擊董茂林稟稱遊擊同差來把總田喜龍公同詢問拿獲逃夷你叫甚麼名子多少歲數了是那裏人甚麼骨頭在什麼地方居住你家裏有的都是甚麼人因何逃走據實說來據稱我叫鄂里克得孫今年三十歲了是準噶爾達子骨頭住在博羅哈嗎爾地方自小兒與達子宗兔家爲奴我娘老子死的早名子歲數我記不得我有兩個哥哥大哥叫捧漢慢吉二哥叫托古斯兩個嫂子一叫錯葉均一叫喀多少歲數我都不知道俱在我主兒宗兔的房子跟前住哩很是窮苦我因主兒打罵的很受苦不過聽得人說天朝地方好大皇帝恩典很重若到天朝就得過好日子了所以我心裏常常想著要逃走前一月黑夜裏記不得日子偷了我主兒宗兔的兩匹馬拿了一小口袋乳渣子一個木盃一個裝水的皮殼殼瞞着我主兒並哥哥嫂子就從博羅哈嗎爾起身來了又問這博羅哈嗎爾離伊里有多少路程你逃來的時候後頭有人追趕不曾你從前逃走過沒

有再你騎的兩匹馬往那裏去了據稱我自小兒就在博羅哈嗎爾住著長大的伊里在那一面子離多少路徑我不知道遠處地方我沒有走過從前也沒有逃走過這是頭一次逃來往這裏來的路我也沒有走過我在準噶爾裏頭聽得人說東面日頭出來的就是天朝地方我就照著日頭向東走來並沒有遇見準噶爾卡倫走到第三日那一晚上風大夜又黑聽得後頭馬蹄子響不知是那裏的幾個人趕著來了拿石頭把我頭上打了一下我騎牽的馬快放馬就跑脫了我沒有敢往後看我頭上這疤就是打下的我騎牽的兩匹馬在路上都乏的丟了口糧也吃完了口袋也丟了止拿了裝水的皮殼殼把轡頭勒在腰裏步行走的路上尋些茨菓子吃渴了喝上些水從逃的那一夜算著走了二十多天在一個泉子上喝水被這裏騎馬的一個人拿住了遊擊隨向該夷說如今準噶爾台吉澤旺多爾濟納木扎爾在大皇帝上甚屬恭順他那裏逃來的人我們如今不肯收留若將你解送回去恐不能保生賞你口糧自己照依原來的路回去罷據該夷說準噶爾台吉如今在大皇帝上恭順不恭順的事情我不知道我只聽說準噶爾投來天朝的人都很受恩的我的娘

老子死的早哥哥嫂子都不照看我與人爲奴受苦不過思想大皇帝是普天  
下的大主子所以我投奔著來要過些好日子我就是一個狗投奔來想着天  
朝也是要施恩收留的如今又著我回去必然是不得活的與其回去受死不  
如死在中國地方就脫生成一個牲畜也到好處了望祈把我收下救我一條  
活命罷遊擊又再三曉諭該逃夷斷不肯回但應否收留理合具稟請示等情  
又據差查把總田喜龍回稱與該遊擊所稟無異據此總兵查前項逃夷經遊  
擊董茂林等查詢雖逃後三日遇有追趕並無被獲後復逃情事再三曉諭不  
肯復回除暫令卡汎看守聽候辦理外其應否收留之處相應聯銜咨請等因  
到臣臣查該逃夷供詞內雖稱從前並未逃過但今次逃走之後遇彼處之人  
追趕用石擊打已有頭疤可驗其是否實無被獲復逃情事抑或尙有隱情未  
曾供出並追打之處是何地名隨咨令鎮臣王能愛再加確查如有前項情事  
詳細開導令其回巢去後茲於閏七月十五日准該鎮臣王能愛等覆稱照依  
來咨內情節隨飛飭三堡遊擊董茂林並差把總田喜龍前赴卡倫再加確詢  
詳加開導令其回巢旋據該遊擊董茂林並把總田喜龍報稱遵即前赴卡倫

復詢據該逃夷鄂里克得孫供稱我逃走了三天那一晚上實在是風大夜黑  
不得知道是甚麼地名後頭打我一石頭的人我沒看見也不得知道是多少  
人我並沒有著他們拿住復逃這都是實話我再沒有說的了等語餘供俱與  
前問供詞相同遊擊等隨再加詳細開導賞以口糧令其回巢該逃夷惟痛哭  
懇求言稱再無可去之路迫急祈留似難拒回祈請酌奪等情各該將弁呈稟  
前來據此總兵看得逃夷鄂里克得孫既經遊擊董茂林等疊次細詢並無被  
獲後復逃情事亦無別項隱情再三曉諭寧死不去哀懇迫切情堪憫惻其應  
如何辦理之處相應聯銜咨報等因咨報到臣臣查前奉諭旨準噶爾投誠之  
人如彼處有被獲復逃情事應詢問明確令其回巢等因欽遵在案今看得此  
次脫出夷人鄂里克得孫係邊僻愚蠢無知之人向聞投來夷人皆沐天朝恩  
澤因與人爲奴受苦不過故投奔前來查該夷雖逃後遇有人追趕用石擊打  
頭有傷疤但鎮臣王能愛差員細加研詢並無被獲復逃情事且該夷哀懇迫  
切有不能復回之情亦屬情實似應照例收留隨咨准鎮臣王能愛照例換給  
衣服支給口糧差弁於閏七月二十五日連人押解到安臣復親加詢問與該

鎮臣等咨報無異除照例派員解送肅州鎮臣史弘蘊轉解赴京交理藩院安  
插外所有訊取供詞謹繕摺奏聞伏祈皇上睿鑒施行再有臣奉到硃批奏摺  
二扣理合一併恭繳謹奏乾隆十三年閏七月二十九日安西提督臣李繩武  
硃批覽



直隸總督方觀承奏明正定城南滹沱河壩工停辦歲修摺

直隸總督臣方觀承謹奏爲奏明事竊照正定府城南之滹沱河自乾隆三年以後溜趨北岸逼近城垣節次在於斜角頭隄以下并大小楊家莊等處建築魚鱗挑水草土各壩以資捍禦所有各壩工應需歲修之費經前督臣高斌奏准借動清河道庫營田工本銀一萬五千兩分發正定府各州縣行鹽商人營運以一分起息資歲修之用如有餘存解交藩庫充公併聲明俟數年後勘明各壩毋庸歲修即行奏請停止將銀收回還項等因遵照在案嗣於乾隆十一年仰蒙皇上臨視河干親加指授第四壩之下添築大壩挑河南徙欽遵如式辦理數年以來臣與司道各員恪遵聖訓隨時加謹增修防護各壩漸次成淤水勢日趨南岸本年伏秋兩汛水發雖仍北漫淤灘而水退泥停灘益增高岸壩各工並皆穩固所備搶修物料未經動用臣令清河道宋宗元細加查勘現在各壩相距河流自一二百丈至四百五六十丈不等壩外沙灘淤高五六七尺與壩後地平等就目今形勢而論挑河南徙已著成效北岸壩工已無衝刷之慮除本年未用料物業飭變價歸款外其乾隆十八年應備歲修料物應

令暫停採辦以省糜費仍俟明年汛發之期察看情形如大溜南徙愈遠鑲墊等工一無所用再將此項歲修生息原本另行具奏辦理所有滹沱河壩工停辦歲修緣由理合恭摺奏明伏乞皇上聖鑒謹奏乾隆十七年十二月初八日硃批知道了

附片

臣節次奉到硃批奏摺共四十五件理合另封恭繳硃批覽

高樸私鬻玉石案

高晉摺三

奴才高晉跪奏爲敬陳感悚微忱叩謝天恩事竊奴才接到大學士公阿桂大學士于敏中寄字內開乾隆四十三年十月二十六日奉上諭前據軍機大臣審訊高樸家人李福供出高晉給與護牌寅著於淮關盤獲時將牌收去李福亦曾於薩載處供明伊等均匿不上聞而高晉於屢次傳諭詢問時亦始終欺隱業經降旨嚴飭並令高晉明白回奏并著寅著將所收高晉原給李福護牌卽行繳出呈覽茲據寅著將護牌進呈閱牌內稱接准欽差駐劄葉爾羌辦事大臣高札知現差家人李福等來南到蘇辦理貢物發給執照以免沿途盤詰等語高晉此事錯謬太甚實出情理之外高樸職係侍郎本非應行進貢之人而駐劄葉爾羌辦事大臣或因所賞養廉優厚積有盈餘將回部玉碗及痕都斯坦所做玉器購買數件呈進朕亦間爲收存若將蘇州所做玉器呈進朕一見卽能辨別不但不收必且查究重治其罪十餘年來從無此事案所共見共聞且高樸又非織造鹽政關差及各督撫可比朕又屢經降旨庚子年七旬萬

壽不許內外大臣進貢亦高晉所深知者若西寧基厚或差人赴蘇辦貢尙屬事之所有高晉可以不問今高樸有何貢之可辦而差人遠赴蘇州且請給護牌執照非私偷玉石至蘇牟利而何高晉非糊塗不曉事之人乃並不向李福盤詰輒給李福護牌其形跡業已顯露是高樸之事高晉雖欲諉爲不知情其誰信之卽令其捫心自問亦恐難於自欺也朕簡任高晉封疆有年因其平日公正自持推心倚畀且目爲督撫中傑出之員今以此事而論所謂公正者在尙得稱爲好總督乎况高晉身爲大學士尤當公爾忘私乃於伊姪高樸偷賣玉石一案始終隱匿欺罔實屬昧良負恩高晉以閣臣而兼總督事君之道當如是乎今朕已加恩不明治高晉之罪着將寅著繳到護牌發交高晉閱看使其知所愧恥伊如尙有人心能無汗惶無地且將何以自解乎高晉着再傳旨嚴行申飭將此遇便發往仍令卽行覆奏欽此並護牌一張遵旨寄信前來奴才跪讀之下惶汗無地伏查奴才之姪高樸受恩深重罔顧天良肆意貪婪行同市儈非人類之所爲乃人心所共憤今春伊差家人李福私帶玉石赴蘇售賣藉稱辦理貢物奴才並不思及高樸本非應行進貢之人且駐劄葉爾羌

辦事大臣從無差人赴蘇辦貢之事奴才既不向其盤詰搜查輒行給以護牌  
事發之後又未據實具奏奴才之昏憤糊塗昧良負恩罪無可道仰蒙皇上不  
卽治奴才之罪屢施格外之恩夙夜慚惶已難名狀茲奉將奴才給過護牌發  
交閱看奴才展對自問更覺置身無地悚懼愧恥涕汗交流奴才於此一事獲  
戾重大問心則有味天良論罪則法無可貸乃蒙聖主如天之仁恩外施恩曲  
賜寬宥予以自新之路奴才感無可報愈思愈怕寢食俱廢請解退大學士之  
任稍贖罪愆復奉恩批亦可不必欽此叨蒙逾格之矜全更出鴻施於再造天  
高地厚感極涕零伏地碰頭莫能自己從此捐糜頂踵亦難仰報高深奴才惟  
有誓矢此生倍加奮勵時時常存敬畏事事秉發天良若再稍涉欺朦稍存玩  
忽則是奴才罪上加罪爲天地覆載所不容更難再邀聖恩於格外矣所有奴  
才感激愧悚微忱理合恭摺叩謝天恩伏乞皇上恩鑒謹奏乾隆四十三年十  
一月初六日硃批覽

楊 魁摺十

江蘇巡撫臣楊魁謹奏爲奏聞請旨事竊照高樸私販玉石案內同夥商人張鸞前經臣遵旨在蘇拿獲查起玉器玉料等項並將其家產查封造冊分別確估變價另行奏解緣由業已恭摺奏蒙聖鑒在案除玉器玉料等件先經委員解京外所有查抄張鸞家內金玉珠飾銀兩佛頭皮統衣料衣服等項應分別解送內務府崇文門交收臣現在督飭兩司造具細冊委員即行起解至張鸞原籍山西寓居蘇州並未置有田產其住房一所原契價市平色銀四千兩舊衣女衣雜件及木銅錫磁器皿馬驟等項嚴飭地方官據實確估共計市平色銀五百八十三兩零臣以張鸞在蘇買賣必有外欠未歸之項逐細跟追查出應追陳德昌等欠項銀二千三百二十一兩又有茶葉本銀五百兩發往甘肅肅州劉三益店售賣又磁器本銀五百兩交柴安國李以挺等帶往陝西甘肅貨賣並有青金石佛頭一副交馮應鐘帶赴廣東售賣此外密加訪察委無隱寄情事統共在蘇估變應追市平色銀六千九百四兩零恭候硃批至日卽飭追變全完解送內務府查收一面飛咨陝西甘肅廣東督撫諸臣查明劉三益等代售茶葉磁器銀兩及佛頭等項一併追解所有解京及留變各件分晰另

開清單恭呈御覽臣謹會同署兩江總督臣薩載恭摺具奏伏乞皇上睿鑒謹  
奏乾隆四十三年十一月初七日硃批覽

勒爾謹摺十

陝甘總督臣勒爾謹跪奏爲遵旨覆奏事竊臣欽奉上諭新疆偷運內地玉石  
必進嘉峪關例應盤詰勒爾謹向來作何查辦且並未見有拿獲之案著勒爾  
謹一並查明具奏等因欽此伏查葉爾羌等處採辦玉石前經原任侍郎期成  
額於乾隆三十八年奏准除挑選進呈外編列號數令官兵商民認買無論山  
玉河玉總以五十觔爲度發給照票其五十觔以外者概不估變等因通行知  
會在案數年以來臣嚴飭關津渡口細加搜查凡有携帶玉石之人俱有照票  
是以照依原議驗票放行嗣准高樸來咨內稱該處奏准於本年爲始間年官  
爲開採一次選取色潤而整重者辦理送京其餘六成令商民領票認買四成  
賞給採玉回衆該處並議定以期成額原議五十觔爲度未免將整塊者勢必  
鑿破亦覺拘泥可惜

硃批此即伊  
作弊本意

嗣後河玉仍照原議五十觔其山玉變價改

爲一百五十觔爲度等因前來自此以後商民販玉進關較多於往昔守關員弁及經過地方官見有照票者甚多未免稽查疎懈以致無票私玉亦得潛行過境毫無覺察實臣未能隨時嚴飭之所致惟有仰懇聖恩將臣勒爾謹交部嚴加議處至失察之地方官容臣查取職名另摺參奏所有臣奉到諭旨理合恭摺奏覆伏祈皇上睿鑒謹奏乾隆四十三年十一月初九日硃批該部嚴察議奏

勒爾謹摺十一

陝甘總督臣勒爾謹跪奏爲欽奉諭旨恭摺覆奏事竊臣欽奉上諭本日巴延三奏查訊張鸞同夥馮致安口供內稱張鸞寄交小的帶往肅州魏象紀信內向肅州道門上袁姓要銀子等語該道係屬何人因何令管門家人與奸商張鸞往來並有銀兩交涉之事其咎實所難辭並著勒爾謹查明係作何事銀兩提犯嚴切訊擬若有私弊將該道據實參奏毋稍徇隱巴延三摺並著抄寄閱看等因欽此查該道陳之銓係由甘肅鞏昌府知府奉旨補授安肅道該道以



地方大員令管門家人與奸商張鸞往來並有銀兩交涉之事誠如聖諭其咎實所難辭伏查此案臣前在西安接准巴延三咨會隨飛檄飭委甘肅按察使達爾吉善前赴肅州親提該道家人袁姓審訊並密查該道陳之銓是否知情業經臣於十月三十日由驛恭摺具奏在案茲欽奉諭旨容臣至蘭州時即提該犯嚴切訊擬若有私弊即將該道據實參奏所有臣奉到諭旨緣由理合恭摺奏覆伏祈皇上睿鑒謹奏乾隆四十三年十一月初九日硃批覽今審出實情否

勒爾謹摺十二

陝甘總督臣勒爾謹跪奏爲盤獲私販玉石商人訊供具奏事竊臣凜遵節次奉到諭旨嚴緝私販玉石當經飛飭各屬查拿在案嗣據署涇州知州張何衢稟報盤獲私販玉石商人三起李步安王振世一起長朋順一起監生毛欣颺一起共計人犯四名所帶玉石當經起獲等情茲臣自西安旋蘭路過涇州提犯到案將所帶玉石眼同秤驗共重七百八十一觔七兩又玉子四個共重七

斤內李步安並傅德玉石五百二觔八兩王振世玉石一百九十二觔四兩玉  
子一個長朋順玉石八十二觔十三兩玉子一個監生毛欣颺玉石三觔十四  
兩玉子二個臣提犯親加研訊此項玉石有在肅州天錫店向回民趙世榮鮮  
四價買者有向肅州居住固原人馬三價買者亦有買自過客不知姓名者據  
該犯等供明趙世榮鮮四籍隸陝西向在肅州臣現在飛飭陝甘各屬上緊嚴  
緝其馬三一犯據長朋順供稱常在阿克蘇居住亦經臣飛咨該管大臣查拿  
誠恐聞風潛回內地並飭令各地方官一體緝拿臣查李步安等既在口外販  
賣玉石必與趙鈞瑞即趙鄉約熟識且是否亦係高樸案內之人均不可知隨  
反復研詰據李步安供出本年五月同夥計傅德在阿克蘇買趙鄉約玉石一  
千觔每觔價銀十四兩共銀一萬四千兩內該犯李步安傅德共出銀六千五  
百兩山西代州人董璠出銀四千兩現住肅州三義店之陝西人徐子建出銀  
二千兩現在涼州府開磁器舖之陝西人師四出銀一千五百兩本年閏六月  
內傅德同董璠將前項玉石送往蘇州等情除飛咨山西蘇州二撫臣將董璠  
傅德嚴行緝拿並飭陝甘二省嚴緝師四徐子建外現將涇州盤獲私販玉石

商人李步安等四名並起獲玉石分起委員解京理合先行馳奏伏祈皇上睿鑒謹奏乾隆四十三年十一月初九日硃批知道了

楊 魁摺十一

江蘇巡撫臣楊魁謹奏爲遵旨查辦先行覆奏事竊臣於乾隆四十三年十一月初二日承准大學士公阿桂大學士于敏中字寄內開乾隆四十三年十月二十七日奉上諭據巴延三奏拿獲張鸞案內馮致安訊據供稱曾與張鸞通同販玉並抄出張鸞在蘇寄伊書信四件信內稱有蘇州近日到料萬觔之數內大白者六七千觔密訪盡是伊什罕家賣出等語此項玉料多至萬觔其白大者六七千觔並據張鸞信內稱訪係伊什罕家賣出必有奸商代爲偷運赴蘇牟利不可不徹底跟究查係何人代運嚴切訊明卽行派員解京訊究並將此項玉石一併解京著將巴延三原摺及信抄寄楊魁閱看令其查照妥協辦理毋任絲毫隱匿又張鸞信內有將銀一千五百兩付柴姓往江西置買磁器之語此項銀兩既係張鸞所出卽屬應行查抄入官之項柴姓何人是否尙在

江西置買磁器著傳諭郝碩嚴密訪查將柴姓飭緝務獲並將伊所帶銀兩貨物盡數追出解京若柴姓業已回至蘇州並著楊魁一體緝查辦將此由六百里傳諭楊魁郝碩知之仍著由驛迅速覆奏並諭巴延三知之欽此遵旨寄信前來臣遵即密訪查辦間同日又承准大學士公阿桂大學士于敏中字寄內開乾隆四十三年十月二十八日奉上諭昨據巴延三奏抄出張鸞在蘇寄馮致安信內稱蘇州近日到料萬觔之數大白者六七千觔密訪盡是伊什罕家賣出之語必有奸商代爲偷運已諭令楊魁查追辦理今思此項運蘇玉石若不指實偷販奸商姓氏概行海查恐滋擾累因命軍機大臣嚴訊張鸞據供本年八月有在蘇開玉行的山西平陽府人李尙賢向我說如今又到了好些玉石我行內有一千五六百觔包萬順行內有六七百觔是山西人趙愛還有一個姓彭的及張善貴董伯易從阿克蘇販來的後頭還有趙鄉約帶玉四五千觔又有好些買賣人帶著二三千觔又白又大聽說都是伊什罕家賣出來的等語復嚴加詰訊以你昨日與馮致安的信並李福與高樸的稟帖俱說是到蘇之玉已有萬觔白大者即有六七千觔你如何只供說止有二千餘觔到

蘇呢又據張鸞供我在李尙賢家看見一塊約有八個成色李尙賢云他們要賣一百兩銀一觔將來到的好白玉狠多你所存八百餘觔之玉成色平常不如趁早賤價賣去若他們的玉陸續販到你的貨越發賣不去了我聞得此信想他們後來如果運到好玉甚多則我的玉卽難售價彼時並不知趙鄉約所帶的玉亦是高樸的所以寫信馮致安並令李福稟知高樸希冀斷住後來別家販賣之事我方且恨他們後來販到的玉又多又好恐壓我的行情如果他們實有萬觔運到蘇州我豈肯轉替他們隱瞞呢但怕蘇州查辦不能照我所寄馮致安信內萬觔之數我豈不更取重罪若將來蘇州查出數目比我所供尚多我願甘罪上加罪再四嚴詰矢口不移訊之李福亦稱係其言得之張鸞各等語張鸞等所供與原稟原信俱屬不符難以憑信但據張鸞供開行之李尙賢包萬順俱有籍貫及坐落地方可查而彭姓趙愛張善貴董伯易俱自阿克蘇肅州等處販玉而來必能知其觔重詳悉著傳諭楊魁即將李尙賢等查拿到案嚴切跟訊此項玉石係何月日何人運到若干由何處偷買通計共有若干內中白而大者若干已賣去若干得價若干未賣去者若干檢查底賬嚴

加審訊務使水落石出仍將各犯派委妥員隔別解京審訊勿稍疎懈其各家起出之玉及賣玉之價並著查明委員另行解京又據永貴奏有商人徐茂如亦與高樸連手曾給過高樸金銀並許送給好玉係沈太經手等語已飛諭永貴令其訊明據實覆奏徐茂如既與各奸商同在回疆自必俱係同夥或事發後潛至蘇州亦未可定著楊魁即速嚴密訪查一經就獲即速派員押解來京候訊將此由六百里加緊傳諭楊魁知之張鸞供詞并著抄寄閱看仍著將查辦緣由即由驛先行迅速覆奏欽此遵旨寄信前來仰見聖慮周詳於法所必懲之中示矜恤無辜之意臣當即密飭藩臬兩司督同府縣各員親赴各玉行將包萬順即鮑萬順趙愛彭姓即彭信義董伯易等各犯拿獲其李尙賢一犯已於本年九月內回山西原籍太平縣張善貴現赴震澤鎮貨買綾綢當即差拿張善貴於初五日到案並將各行底賬及現存玉料全行起出查各賬伙食買辦居多而登記玉石之處零星寥落記註無幾恐各犯等有豫行藏匿情弊隨督同兩司等逐一隔別嚴訊據該犯等同供到蘇販賣玉料之人並非專賣玉料俱係來往甘肅肅州及阿克素葉爾羌等處販賣綢緞雜貨私行夾帶玉

塊赴蘇售賣而各行住歇客商亦非專開玉行故客人帶玉到行各客自爲記賬或有在行交易或有售買無人客去貨存者行中登賬現有起出賬簿可查等語臣檢閱各賬逐加研鞫緣鮑萬順在蘇獨自開行李尙賢張善貴李業任廷林四人在蘇夥開公棧名爲任公棧李尙賢又與趙愛在肅州綢緞雜貨店內同夥彭信義又與張善貴夥友陳宏德合夥各犯俱曾帶有玉料到蘇售賣惟董伯易供認曾到阿克素餘犯俱供並未出關其玉石舛重何年月日何處價買該犯等雖俱供有來歷而奸商狡獪現因質對無人難以據信至伊等賬內存玉無幾偷販到蘇其已賣者必不止此數件覆加究詰據任廷林供出史永立柴德蘭魏良弼張成丁履吉沈瑞李業等曾販玉來蘇其售主價銀雖據供出而各犯多已回籍其來歷均應咨訊臣查各行內現存玉石五十二塊玉子六個玉子兩半個共重市秤八百八十六觔一兩已賣玉五十六塊共重市秤一千二百八十七觔十兩共價銀四萬一千七百五十七兩三錢內賬註二月收織造府銀二宗共八千二百三十一兩三錢賬簿止有銀數詰據李業供有玉一塊重一百九十觔係本年正月賣與舒織造又柴德蘭玉一塊重六十

舛賣與張義臣價銀六千五百兩查柴德蘭七月運玉到蘇住居任公棧此棧即係李尙賢所開追起玉料已鋸作五件玉質較他玉稍白合之舛數賣價與張鸞至李尙賢行所見之玉相似臣當即飭令存貯司庫再查張鸞所供李尙賢向伊云行內有玉一千五六百舛鮑萬順行內有玉六七百舛又有好些買賣人帶着二三千舛又大又白聽說都是伊什罕家賣出來的今查任公棧已未賣玉止一千餘舛鮑萬順止五百餘舛恐該犯等尙有隱藏不吐情事加以刑嚇矢口不移至買賣人帶玉二三千舛亦應嚴加函訪隨逐細根追又查出陳瓜棧存有玉料十塊重一百五十七舛雖據供出來歷尙須咨查又朱公益家存玉料六塊重二十四舛玉子兩半塊重三十九舛研訊帶玉客人俱已回籍其來歷亦應咨查此外訪無客人帶玉來蘇當取各行甘結存案至徐茂如一犯臣接奉諭旨卽嚴飭府縣密加查拿現在蘇城並無其人惟訪有徐舜如係蘇州人當卽傳喚到案據供伊於三十八年自蘇到甘肅販賣雜貨四十一年八月到阿克素十一月到葉爾羌曾見周星若弟兄四十二年正月回到阿克素八月到肅州本年二月回蘇伊在阿克素曾向蘭州人回子馬姓買過玉



料兩塊重二百二十觔三月在揚州寶玉行內焦麻子閔東說合得價七千兩  
寶與淮關伊監督伊在葉爾羌並不認識張鸞亦未見過高樸等語嚴詰至再  
堅供如一除買玉料之織造舒文臣面詢買玉是實現自據實具奏又鹽政伊  
齡阿臣已飛劄移知是否確實令其自行陳奏外臣現將鮑萬順趙愛彭信義  
張善貴董伯易等五犯遵旨委員分五起隔別解京審訊其頭起於初十日起  
程餘俱按日前進飭令小心押解並移咨前途一體撥護徐舜如一犯雖據堅  
供與高樸並未謀面但既到回疆逗遛數月又偷買玉料與周星若熟識且姓  
名字派與徐茂如相似所供恐多狡賴相應一並解京質訊並將賣過玉料銀  
七千兩照數追出仍嚴飭府縣密拿徐茂如毋使漏網至要犯李尙賢係山西  
平陽府太平縣人今年九月二十二日自蘇回籍臣飛咨山西撫臣密速拿解  
赴京投審其餘案內各犯現在蘇州者發縣分別保釋有應訊究玉料來歷者  
分咨各撫臣嚴訊明確分別辦理各行已賣玉價元銀九五兌共四萬一千七  
百五十七兩三錢除在蘇城者飭縣追繳外其回籍之人分別咨追解京各行  
起出玉料八百八十六觔一兩及張義臣所買之料一併委員另行解京所有

各犯供單並玉料銀數清摺賬簿九本恭呈御覽理合將臣遵旨查辦緣由由驛覆奏至張鸞遣夥柴安國赴江西買磁器銀一千五百兩臣已於查辦張鸞衛全義案內先已飛咨江西陝甘各省截留查追在案合併陳明伏乞皇上睿鑒謹奏乾隆四十三年十一月初十日硃批「已有旨了」

舒文摺六

奴才舒文跪奏爲據實奏明仰祈聖鑒事乾隆四十三年十一月初六日接見撫臣楊魁面詢奴才正月內曾否買有李客玉料之事奴才當將正月內原憑玉匠頭買玉料一塊觔兩價值俱屬相符現在琢做之語告知奴才伏查蘇城市賣玉器雖多但款式俱未能規矩是以奴才歷來均係購買玉料自行仿照舊樣督匠成做本年正月內經玉匠頭講買任公棧客李業玉料一塊重一百九十觔計市平色銀八千二百兩硃批此皆因汝等擡價賞買以致奸商獲利朕若知此早不收爾等玉器矣可笑然此非汝罪罪在高樸之事當卽令匠截溜去石性照依材料大小酌取得玉瓶洗汝明知而詐欺作不知當卽令匠截溜去石性照依材料大小酌取得玉瓶洗並陳設等料共七件又插屏料一對因奴才六月內進京陛見以致耽延俱未

做完理合將玉料連樣一並進呈御覽應否照樣成做之處仰懇天恩仍發給奴才價辦完工送交造辦處恭繳再劄下回殘玉料大小八十塊計重四十七觔十三兩一並送京呈覽謹據實繕摺恭奏伏乞聖主睿鑒訓示奴才跪奏乾隆四十三年十一月初十日硃批「覽」

### 閔鶚元摺

安徽巡撫臣閔鶚元謹奏爲遵旨查明參奏事十月二十七日准兵部火票遞到大學士公阿桂大學士于敏中字寄內開乾隆四十三年十月二十三日奉上諭據巴延三明白回奏並自請議處一摺內稱李福張鑾確由何路入山西境行走至山西汾州路徑共有三條俟部臣訊明李福張鑾確由何路入山西境再將未經盤獲之地方官查參等語現據軍機大臣訊明張鑾李福攜帶玉石於上年十月內起身由甘州涼州行走今年二月入山西境由綏德永寧汾州平陽等處前往河南由臨淮關至浦口換船過江甯由泗安一路繞道四月初至蘇州等語沿途地方官何以毫無盤詰着巴延三卽將山西各處不行盤獲

之地方官查明參奏至巴延三平日不能稽查覺察所司何事甚屬非是即交部嚴加議處不過革職留任仍不足以示儆着傳諭巴延三卽行切實自行議罪具奏其甘肅自嘉峪關及各州縣復由肅州至涼州所過之地最多且所至均有查拿玉石之責乃竟聽伊等安行無忌該地方官獲譴甚重即河南安徽江蘇浙江不能盤查之各地方官及各關監督亦均難辭咎並着各該督撫查明參奏將此由六百里諭令知之欽此遵旨寄信到臣經臣飭司欽遵移行確查詳參去後茲據布政使農起按察使秦雄飛詳稱查得李福等私帶玉石自河南至臨淮應由安徽省鳳陽府屬之宿州入境經靈璧縣至鳳陽縣之臨淮關自臨淮至浦口應由定遠縣滁州至江蘇之江浦縣地方出境所有經過不能盤查職名係宿州知州金明源靈璧縣知縣徐德懷鳳陽縣丁憂知縣于萬培定遠縣知縣西登額滁州知州李秉義不行查察之道府職名係鳳陽府知府兼護廬鳳道福保應請開參聽候部議至從浦口換船過江寧由泗安一路繞道至蘇應開職名查泗安係浙江長興縣所轄若李福等不由鎮江行走即應由安徽省太平府屬之當塗寧國府屬之宣城並建平廣德經過所有不能盤查

職名係當塗縣知縣冀邁前署宣城縣事旌德縣降調知縣陳肇森建平縣知縣杜明德廣德州知州石應璋不行查察之道府職名係太平府知府沈業富寧國府知府恒豫前任安徽寧池太道陞任西安按察使劉增相應一併開參候部查明分別查議至失察兩司職名係布政使農起按察使秦雄飛開具職名請參前來謹恭摺參奏請旨交部分別議處至李福等於三月間經過臨淮口雖據該關監督盧鳳道基厚查覆該關玉石向不報稅亦並不知李福等經過但不行盤查詰獲咎亦難辭所有前護盧鳳道兼護鳳陽關務之鳳陽府知府福保應請交部嚴加議處至臣自任封疆乃於奸徒私帶玉石經過地方不能督察稽查實非尋常失察可比相應請旨將臣交部一併嚴加議處以爲疎玩者戒所有遵查應參各官緣由理合恭摺由驛覆奏伏祈皇上睿鑒謹奏乾隆四十三年十一月初十日硃批該部議奏

薩 載摺五

署理兩江總督江南河道總督臣薩載謹奏爲遵旨查明恭摺覆奏事竊照高

樸家人李福在京供出自蘇州起身經過由閘揚關將高樸名帖並總督高晉所給護牌上去討關管關之常鎮道不在家管關之人就即驗放等語欽奉諭旨以李福過由閘揚關是否如所供情形並著查明具奏等因欽此隨經飛飭署常鎮道袁鑒查提前道孫栝任內管關書辦家人訊供稟覆去後今據該署道袁鑒稟稱遵提孫前道任內揚關家人胡元書辦鄭啓福由關家人劉玉書辦殷元舒逐加確訊據稱李福船隻先到由關持有高樸名帖及總督護牌說是貢船要討關過去隨上船抽驗四箱俱是玉器衣物其餘箱匣未經開看當即放行後過揚關亦有名帖護牌討關因由關已經驗放亦即放行等情稟覆前來臣復加查核該關家人書辦胡元等各供李福過關情形實與李福在京所供相符原任常鎮通道孫栝於李福過關之時雖係因公出境但其不能督率在關人役嚴密稽查以致縱漏有負職守業經臣參奏請旨革職其在關人役胡元等亦經臣審擬枷責附摺奏明奉到硃批知道了欽此欽遵轉飭發落在案所有查明李福經過由閘揚關與在京所供情形相同理合恭摺奏覆伏乞皇上睿鑒謹奏乾隆四十三年十一月初十日硃批覽

畢 沅摺九

陝西巡撫臣畢沅跪奏爲拿獲趙世保審出伊父趙鈞瑞各同夥販運玉石赴蘇售賣得過銀兩並辦貨會借使用各銀數恭摺具奏事竊臣欽遵諭旨查抄趙鈞瑞家產貲財並查獲趙世保等自蘇州辦回綢綾雜貨等物業經恭摺由驛馳奏臣當即出示曉諭凡有寄頓趙鈞瑞財物者速行據實首出尙可邀恩免罪旋據咸寧縣民馬花奇首報趙世保於本年本月自甘肅回陝帶有玉石四十九塊約重三百餘觔因無人要買寄存伊家馬花奇於五月內販羊外出今始回家聞知趙鈞瑞事發並閱告示不敢隱匿將玉石首出等情臣隨將所首玉石秤重三百八十三觔十四兩驗明封貯旋卽先後拿獲趙世保余金寶到案臣率同司道等嚴加確審據趙世保供稱伊於上年同趙金海等起程回家伊父趙鈞瑞交付玉石四十九塊重三百八十餘觔令其帶回售賣並告稱有同夥衛良弼徐盛如等陸續帶有玉石數起已赴南方貨賣囑趙世保到彼算賬收銀趙世保路經西安因回渭南家中娶親將玉石暫寄素識之馬花奇

家內本年三月內趙世保同趙金海余金寶三人並雇黃虎兒跟隨同赴蘇州住居穿珠巷汪姓店內詢知衛良弼等所帶玉石四起共約重四千餘觔每起合夥人數多寡不一各人所出本銀亦多寡不齊玉石所賣銀兩照股分收共計賣出蘇平色銀一十四萬一千兩除現在約期候交銀八千兩內趙世保應分銀二千六百六十六兩尙未收到外趙鈞瑞名下實收過蘇平合曹平紋銀三萬二千兩外趙金海在蘇州收存玉如意一枝玉瓶一件又蘇州未賣玉石二百觔其趙世保所收銀兩在蘇州置買綢綾雜貨等物共本銀七千餘兩又綢箱內元寶三個計重一百四十八兩零同貨物前已起獲又付江西買磁器銀三千兩運至西安現已起獲又會借與西安三原長安肅州五票共計銀九千四百兩又還伊父賒欠各家貨賬銀九千四百五十兩有中人王九葉五可憑又在蘇給玉匠手工銀二百兩統計共支過銀二萬九千一百九十八兩零下存銀一千八百兩現已交出其餘銀一千餘兩俱係盤費腳價使用外帶回玉雙桃一個玉如意一枝又替張連帶回玉佛手二件均已交出因蘇州尙有尾賬未清留趙金海在彼討取並稱所販玉石係伊父同夥計等合辦其買自



何地何人伊並未經手不知底裏並將在蘇收銀用銀各數目欸項詳細開列清單二紙臣俱逐條查核已屬符合尙恐此外或有隱匿不實不盡之處再四嚴詰據供蘇州合夥各賬俱已逐一說出伊父已犯重罪斷不敢再有絲毫隱瞞況蘇州拿獲趙金海並同夥俱可質對得出等語矢供不移似無遁飾至余金寶一犯訊據供稱係趙鈞瑞小夥計每月得受身錢並非合夥出本分利之人質之趙世保供亦相符臣查趙世保等自蘇州辦回綢綾雜貨等物用本銀七千餘兩又元寶三個重一百四十八兩零前已起獲開單具奏在案其辦到磁器用本銀三千兩現已起獲又會給西安買賣人銀四票共銀七千四百兩亦據各家照數交出至會給肅州李業銀二千兩臣已飛咨督臣勒爾謹查明追繳所有趙世保用剩銀一千八百兩同帶回玉雙桃玉如意並替張連帶回玉佛手二件亦俱交出又寄存馬花奇家玉石三百八十三觔零先已據報首出查趙鈞瑞等販賣玉石得價買貨及一切支用數目雖據趙世保逐項開出但此外有無隱匿寄頓仍再行密訪嚴查斷不令絲毫匿漏至趙世保供出之同夥各人分過銀數約計十萬兩有零自應一並追出以警奸販除飛咨各省

督撫臣逐一查明數目是否符合速行著追其同夥之王二等係陝西人現在曾否回家臣已飛飭地方官嚴拿究追查辦至現在首出玉料及交出銀兩玉器先行派員解京貨物磁器應按價估變再行續解外所有審明辦理緣由理合恭摺馳奏並訊過各供賬目分繕清單恭呈御覽伏祈皇上睿鑒謹奏乾隆四十三年十一月初十日硃批知道了

畢 沅摺十

陝西巡撫臣畢沅跪奏爲恭摺覆奏事竊臣承准大學士公阿桂大學士于敏中字寄內開乾隆四十三年十月二十八日奉上諭據永貴奏有商人徐茂如亦與高樸連手曾給過高樸金銀並許送給好玉等語因訊之張鸞據供趙鄉約夥計有個徐三曾託他帶過信與高樸不知他叫什麼名字其人係西安人等語徐三是否即係徐茂如難以懸定但據稱係西安人或在陝甘一帶逗留藏匿亦未可定著傳諭勒爾謹畢沅即將徐三查拿到案若即係徐茂如固應解京訊明治罪即非徐茂如而既與趙鄉約同夥又曾代張鸞寄信亦係偷販

玉石案內知情之人並著該督撫於訊明後即派妥員解京訊究仍將查辦緣由迅速覆奏欽此遵旨寄信到臣隨即飭屬密訪查拿去後茲據長安縣知縣丁尹志稟稱訪得徐三家住省城南三門村當即帶役親往查拿徐三之妻康氏供稱伊夫徐三名徐偉于乾隆三十五年出門往西邊謀生至四十二年間知在趙鈞瑞處做小夥計至今並未回家平日並不叫徐茂如等情傳訊隣佑鄉地人等僉供無異具稟到臣臣復密訪確查徐三在外尙未回家除飭各屬再行嚴密差緝倘該犯已經回陝途中聞風藏匿立即拿獲解報并飛咨口外辦事大臣暨督臣勒爾謹將徐三嚴拿務獲委員解京訊究外所有查明徐三並非徐茂如并現在緝拿緣由理合恭摺覆奏伏祈皇上睿鑒謹奏乾隆四十二年十一月初十日硃批覽



一給辛未科會試武舉盤費打箭爐喇嘛口糧以及解銀鞘匣包布等銀九百

七兩四錢五分一厘此係隨時動用十年並無此款

嘉慶十七年共歲出銀一百五十三萬八千三百一十三兩一錢四厘較之十年

出銀一百六十三萬一千四百七十八兩三錢八釐計少出銀九萬三千一百六十五兩二錢四釐內照例支給銀一百五十

三萬七千二百四兩五錢二分九厘隨時動用銀一千一百八兩五錢七分

五厘

再查該省歲出銀一百五十三萬八千三百一十三兩一錢四厘以前項歲入

銀一百六萬九千四百二十三兩二錢八分五厘抵支外計不敷銀四十六

萬八千八百八十九兩八錢一分九厘在於本省秋撥存剩鹽茶雜稅銀內動用

廣東省

嘉慶十七年額徵地丁雜稅等銀一百八十九萬一千三百六十九兩三錢二

分七釐內除緩徵未完等銀八十三萬六千六百四十五兩八分三釐外

實徵銀一百五萬四千七百二十四兩二錢四分四釐較之十六年歲入銀一

二兩一錢七分七釐計少入銀七十九萬八千六百七十七兩九錢三分三釐因是年地丁有緩徵未完銀兩雜稅係虛收儘解是以較少

支銷各款開後

照例支給十七年比銀數相同之款

一給拜牌香燭致祭文武二帝廟並各壇廟品物憲書工價辦解廣膠解部高

錫白蠟榆梨二木降香銅鉛價脚修理學宮各營公費貧士學租民壯工食

以及兵丁紅白賞項等銀九萬九千三百六十九兩九錢零較之十六年歲支銀數相符

照例支給十七年比銀數較少之款

一給致祭文廟品物文職官役俸工武職官兵俸餉驛站工料節婦建坊修船

工料迎春土牛將軍衙門執事人役工食鄉飲酒禮以及孤貧口糧等銀一

百四十三萬七千三百四十三兩一錢零較之十六年歲支銀一百五十七萬三千四百四十八兩二錢零計

少支銀一十三萬六千一百五兩一錢零因品物預提先接不一俸工兵餉驛站缺曠不齊建坊視禮部題准修船工料支銷無定工食酒禮口糧計

人核給是以較少

照例支給十七年比銀數較多之款

一給出洋捕盜陣亡官兵卹賞祭葬等銀四萬八千三百四十八兩七錢零較

十六年歲支銀一萬八千四百八十一兩零計多支銀二萬九千八百六十七兩七錢零因卹賞祭葬計人核給是以較多

隨時動用十七年所有之款

一給歲貢旗匾辦解廣錠價脚以及供應過往官眷馬匹草折等銀三百六十

六兩九錢零此係隨時動用十年并無此款

隨時動用十七年所有之款

一給協撥貴州省兵餉鉛本賞賚老民絹棉米肉操鎗藥鉛等銀三十一萬五

千四百四十八兩八錢零此係隨時動用十年並無此款

嘉慶十七年共歲出銀一百五十八萬五千四百二十八兩六錢零較之十六年歲出銀

二百萬六千七百四十七兩九錢零計少出內照例支給銀一百五十八萬

五千六十一兩七錢零隨時動用銀三百六十六兩九錢零

再查該省歲出銀一百五十八萬五千四百二十八兩六錢零以前項歲入銀

一百五萬四千七百二十四兩二錢四分四釐抵支外計不敷銀五十三萬

七百四兩三錢五分六釐在於鹽課關稅項內撥給

廣西省

嘉慶十七年額徵地丁雜稅等銀八十五萬四千八百三十八兩三錢零較之十六

年歲入銀六十三萬九千七百七十五兩九錢零計多入銀二十一萬五千六百二十二兩四錢零 因地畝陞除不一雜稅係儘收儘解是以較多  
支銷各款開後

照例支給十七年比 銀數相同之款

一給致祭文廟品物書院膏火文職各官養廉營中公費兵丁紅白賞項買補

米價撥給本省並委解貴州省兵餉以及囚糧等銀四十三萬五千六十一

兩七錢零 較之十六年歲支銀數相符

照例支給十七年比 銀數較少之款

一給文職官役俸工武職官兵俸餉驛站工料節婦建坊不敷兵糧米折以及

歲貢坊儀等銀二十三萬三千七百八兩七錢零 較之十六年歲支銀三十萬二千五百九十七兩

六錢零計少支銀九萬八千八百八十八兩九錢零 因俸工兵餉驛站缺曠不齊建坊視禮部題准兵糧米折數目無定坊儀計人核給是以較少

照例支給十七年比 銀數較多之款

一給各營俸餉馬乾以及孤貧板木等銀三十九萬五千三百二十二兩三錢

零數之十六年歲支銀二十七萬五千三百二十一兩三錢零計多支銀一十二萬一兩零 因俸餉馬乾缺曠不齊板木計人核給是以較多

隨時動用十七年所無之款



一給會試武舉路費壽民賞緞等銀一千二百兩九錢零

此係隨時動用十年並無此款

嘉慶十七年共歲出銀一百六萬四千九十二兩七錢零

較之十六年歲出銀一百四萬四千一百

八十一兩五錢零計多出銀一萬九千九百一十一兩二錢零

查均係照例支給之項

再查該省歲出銀一百六萬四千九十二兩七錢零以前項歲入銀八十五萬四千八百三十八兩三錢零抵支外計不敷銀二十萬九千二百五十四兩四錢零在於節年存剩雜款銀內動支

雲南省

嘉慶十七年額徵地丁雜稅等銀七十三萬七千七百三十四兩零

較之十六年歲入銀

百二十五萬九百一十二兩零計少入銀五十一萬三千一百七十八兩零因地畝陞除不一雜稅係儘收儘解是以較少

支銷各款開後

照例支給

十七年比十六年

銀數相同之款

一給致祭文廟品物憲書工價武職養廉營中公費貧士學租舖兵丁食以及

鞭春等銀一十一萬四千一百二十五兩零

較之十六年歲支銀數相符

照例支給十七年比銀數較少之款

一給武職官兵俸餉驛站工料借放兵餉節婦建坊兵丁紅白賞項孤貧口糧

以及採買兵米倉穀等銀一百二十五萬二千四百三十九兩零較之十六年歲支銀

一百三十萬四千二百九十七兩零計少支銀五萬一千八百五十八兩零

因俸餉驛站缺曠不齊建坊視禮部題准賞項口糧計人核給兵米倉穀數目無定是比較少

照例支給十七年比銀數較多之款

一給文職官役俸工廩生餼糧辦顏料水脚以及買補囚糧穀價等銀二十

三萬九千一兩零較之十六年歲支銀二十一萬八千四百一十兩零計多支銀二萬五百九十一兩零因俸工缺曠不齊餼糧計

人核給顏料水脚囚糧穀價數目無定是比較多

隨時動用十七年所有之款

一給採辦銅劬價脚盤費等銀一萬二千三百七十七兩零此係隨時動用十六年並無此款

隨時動用十七年所有之款

一給耆民賞緞絹棉肉價會試武舉水脚以及賞卹官員祭葬等銀九百四十

四兩零此係隨時動用十七年並無此款


# 中華民國二十年二月十一日出版

史料旬刊第二十六期

編輯所 故宮博物院文獻館

發行所 神武門外發售室

印刷所 京華印書局



		價目表	
		每旬一冊	預定半年
本市	外埠	四角	十八冊
	外國	六角五分	三十六冊
上海	外埠	四角	十八冊
	外國	六角五分	三十六冊
天津	外埠	四角	十八冊
	外國	六角五分	三十六冊
其他各大書店均有代售		本院發寄刊物均交郵局掛號遞送以免遺失	